



(p. 3)

Factum du procès pendant au grand Conseil du Roy,

ENTRE MESSIRE HENRY DE
Lorraine, Archeuesque Duc de Rheims, premier
Pair de France, & Legat né du Saint Siege, defen-
deur en requeste afin d'opposition, & en lettres en
forme de requeste ciuile.

*Contre Messire Claude de Rebé, Archeuesque de Narbonne,
demandeur.*



L est constant entre les parties, que feu
Monsieur le Cardinal de Ioyeuse, grand on-
cle de Monsieur de Rheims, a eu cy deuant
le tiltre de l'Archeuesché de Narbonne.

Depuis, il en fist pourueoir sur sa demis-
sion Messire Louis de Veruins sa creature, à
la reserue de tous les fruits sa vie durant, ne restant au titulai-
re pour son entretenement que la somme de quatre mil cinq
cens liures par chacun an.

Or cette reserue des fruits accordée par le feu Roy, & ca-
nonisée par le Saint Siege, fut homologuée au Parlement de
Tholozé du consentement de Monsieur le Procureur Gene-
ral, & en suite Monsieur le Cardinal de Ioyeuse en a iouy pai-
siblement tant qu'il a vescu.

Après son décès, le Roy desirant tesmoigner à Monsieur le
Duc de Guise la satisfaction qu'il auoit des grands & signalez
seruices qu'il a rendus à sa Maiesté, des interests de laquelle il

A



ne s'est iamais separé; luy accorda par breuet du dernier iour
d'Aoust 615. six Abbayes qui auoient vacqué par la mort de
Monsieur le Cardinal de Ioyeuse, la reserue dudit Archeues-
ché de Narbonne, avec la continuation de la mesme reserue
des fruits d'oit iouïssoit ledit Seigneur Cardinal, expliquée par
ledit breuet du nom de pension, pour en faire pourueoir vn
des Messieurs ses enfans, ou telle autre personne capable que
ledit Seigneur Duc de Guise voudroit nommer à sa Majesté.

En execution dudit breuet, Monsieur & Madame de Gui-
se ayans destiné à la profession Ecclesiastique Monsieur de
Rheims leur fils, qu'on appelloit lors Monsieur de Ioyeuse,
âgé seulement de trois ans, ne voulurent pas que le reuenue de
ces benefices passast par leurs mains: mais par vn acte de pieté
memorable, & qui n'a point d'exemple en nos iours, obtin-
drent vn œconomat du Pape Paul V. par lequel l'administra-
tion des benefices portez par ledit breuet, est entierement
commise aux Superieurs des Peres de l'Oratoire, pour dispo-
ser des fruits en œuures pies, & les appliquer au seul profit &
auantage de l'Eglise, iusqu'à ce que Monsieur de Rheims eust
pris la tonsure.

Mais afin que dans cét œconomat on ne fist entrer la conti-
nuation de ladite reserue des fruits dudit Archeuesché de
Narbonne, laquelle n'eust receu en Cour de Rome difficulté
quelconque, notamment sous l'adueu du Roy, & en faueur
d'un Prince dont la valeur & la vertu de ses ancestres ont me-
rité si souuent les graces & benedictions du Sainct Siege.

Le Conseil prendra, s'il luy plaist, quel fut le procedé du
sieur de Vernins; Il supplia tres-humblement Monsieur &
Madame de Guise de ne point permettre qu'on vist en son
Archeuesché des Peres de l'Oratoire, ayans à son exclusion le
maniement de ces fruits; car puisque leur dessein n'auoit autre
obiet que l'honneur de Dieu, & le bien de son Eglise, il enga-
geoit sa conscience d'en vser pieusement selon leur inten-
tion, en bon œconome, & dispensateur, qui cognoissoit
mieux que nul autre l'estat de son Diocese.

Et cependant pour asseurer le droit dudit Seigneur Arche-
uesque de Rheims, qu'il passeroit procuration pour conuertir
la reserue dont il auoit pleu au Roy le gratifier, en vne pension

de trente mil liures par chacun an, laquelle seroit créée à son profit sur tous les fruits & reuenus dudit Archeuesché de Narbonne.

Cette proposition fut considérée par Monsieur & Madame de Guise, comme venant d'un Prelat dont la probité leur estoit cogneüe, grand Casuiste, grand Theologien, & d'ailleurs ancien seruiteur de la maison de Loyeuse. Ils luy mandent donc de venir à Paris pour resoudre, & terminer l'affaire selon que leur Conseil de conscience le iugeroit à propos.

Au mois de Iuin six cens seize, le sieur de Veruins estant arriué à la Cour, on met sa proposition sur le tapis; elle est examinée par Monsieur de Monthelon Intendant de feu Madame Sœur du Roy, les sieurs du Val, Gamache, & Isambert, Professeurs de Sorbonne, & le Pere Archange Capucin. En fin, leur aduis fut d'accepter l'ouverture dudit sieur de Veruins, lequel en mesme temps passe procuration pour consentir en Cour de Rome la creation de ladite pension de trente mil liures, payable à Monsieur de Rheims sa vie durant.

Mais il est à obseruer que comme Monsieur & Madame de Guise auoient abandonné aux Peres de l'Oratoire le reuenue des Abbayes qui auoient vacqué par la mort dudit Seigneur Cardinal de Loyeuse, pour en disposer pendant le bas âge de Monsieur de Reims, le plus vtilement qu'il se pourroit pour l'Eglise; ils voulurent accorder la mesme grace au sieur de Veruins, & pour donner plus de moyen à ce vieux Prelat septuagenaire de finir saintement le peu d'années qu'il auoit à viure, ils luy remirent pendant sa vie le payement de ladite pension qui appartenoit à Monsieur de Rheims leur fils, afin que de ce reuenue ledit sieur de Veruins peust reparer les ruines de son Archeuesché, remettre tous les edifices en bon estat, & en somme exercer les autres œures de charité & de deuotion, conuenables à sa dignité.

Depuis & en suite de la procuration dudit sieur de Veruins, le Roy donna son breuet le 28. Iuin six cens seize, par lequel il eut agreable ladite pension, & escriuit à sa Sainteté pour en accorder la signature de creation à Monsieur de Rheims.

Pendant ce temps Monsieur & Madame de Guise auoient enuoyé à Rome le sieur de Rebé, pour poursuiure de leur part

auprès du Sainct Pere l'oeconomat dont il a esté parlé cy deuant en faueur des Peres de l'Oratoire.

Ils creurent qu'ayant eu l'honneur d'auoir esté domestique de Monsieur le Cardinal de Ioyeuse, & d'auoir fait avec luy diuers voyages en Italie; il ne pouuoit manquer d'affection pour les seruir, ny d'adresse pour executer en Cour de Rome les commissions qu'ils luy donneroient.

Cela fut cause qu'on luy fist tenir la depesche du Roy touchant ladite pension, sur laquelle ledit sieur de Rebé sollicita, & fist expedier luy mesme la signature de sa Saincteté, portant creation d'icelle au profit de Monsieur de Rheims, suiuant le breuet du Roy, & consentement dudit sieur de Veruins Archeuesque.

Mais il faut remarquer en cet endroit vne action digne de la prouidence, & pieté du Sainct Pere; c'est qu'en creant ladite pension, il y apporte des modifications si raisonnables, & si auantageuses pour les titulaires dudit Archeuesché de Narbonne, qu'il n'y eut iamais pension imposée sur benefice qui se trouue plus canonique, ny mieux establie.

Premierement, le Pape met en consideration l'illustre naissance de Monsieur de Rheims, & cette auguste dignité de Prince qu'il a iointe à la profession Ecclesiastique, laquelle ne pouuant apporter que beaucoup d'appuy, & d'ornement à l'Eglise, il estoit iuste que sa Saincteté luy departist les moyens d'y pouuoir viure conuenablement à sa qualité.

C'est donc la premiere consideration qui a donné lieu à ladite pension; *ut iuxta preclari generis nobilitatem commodius & decentius sustentari valeat.*

En second lieu, le Sainct Pere descharge ledit sieur de Veruins Archeuesque, du payement de ladite pension pendant le bas âge de Monsieur de Rheims, veut & ordonne qu'il ne la puisse demander ny receuoir, sinon apres auoir pris la tonsure. *Postquam clericali caractere rite insignitus fuerit.*

Finalement ladite signature porte vn decret qui met les Archeuesques de Narbonne hors d'interest, & leur laisse tout ce qu'il faut de reuenu pour soustenir la dignité splendidement pendant la vie dudit Seigneur de Rheims pensionnaire.

Les termes dudit Decret sont : *Dummodopensio ipsa duas ex*

5

tribus partibus fructuum mensa Archiepiscopalis non excedas, & saltem quinque millia scutorum auri in auro moderno, & pro tempore existenti Archiepiscopo dictae Ecclesiae Narbonensis remaneant. D'où le Conseil peut recueillir avec quelle équité & circospection ladite pension a esté créée; on y a preallablement assuré les droits du Titulaire, & pourueu à sa condition auant que rien ordonner pour la seureté de ladite pension.

Le Pape a fait vne partition canonique du reuenue dudit Archeuesché de Narbonne: affecte cinq mil escus d'or en or pour l'entretienement des Archeuesques, le reste est destiné pour les charges & la pension de Monsieur de Rheims.

De maniere que si après la portion du Titulaire, & les charges acquittées, il ne se trouue pas de quoy payer entierement ladite pension de trente mil liures par chacun an; c'est au detrimment du pensionnaire seul, il n'y a que luy de greué: les charges de l'Archeuesché, & la part de l'Archeueue, n'en souffrent aucun preiudice, ny diminution.

Mais voyons quelle a esté l'origine, & le sujet de ce procès.

Le sieur de Rebé estant de retour du voyage qu'il auoit fait à Rome pour l'obtention dudit Oeconomat, pendant lequel ladite signature auoit esté expédiée à sa poursuite & sollicitation. Il iugea qu'après la mort de Monsieur le Cardinal de Joyeuse son Maistre, il ne pouuoit prendre vn establissement plus auantageux pour sa fortune, que dans le seruice de Monsieur de Rheims: Il fait donc en sorte qu'il est employé aux affaires de ce ieune Prince; Monsieur & Madame de Guise luy en donnent la principale direction, croyans eleuer vne personne affidée, qui ne se departiroit iamais du respect qui leur estoit deu, ny des interets de leur maison.

En premier lieu, il est estably par leur moyen, & de leur consentement Vicaire general de Monsieur de Rheims.

Mais ils ne se contentent pas de l'auoir honoré de cette qualité: ils le font en mesme temps chef du Conseil de ce Prince, employé dans les estats de sa maison avec gages & appointemens de douze cens escus par chacun an, dont il a esté payé non seulement par quartier, mais bien souuent par auance, & de mois en mois, comme il a voulu, pour monstrier qu'il n'auoit point de reuenue plus assuré pour subuenir à son entretienement.

On obmet icy les deniers extraordinaires qu'il a touchez pour tous les voyages qu'il a faits, desquels il a esté payé comme bon luy a semblé, sans qu'on se soit enquis du menu, ny qu'on ait examiné aucunes parties de sa despence.

En l'année six cens vingt-vn, Monsieur le Cardinal de Guise estant venu à deceder, & par sa mort le Roy ayant conserué ses benefices à Monsieur de Rheims son nepueu, l'assurance de l'Archeuesché de Rheims qui auoit vacqué, fist changer le dessein qu'on auoit pris pour le titre de celuy de Narbonne.

Monsieur & Madame de Guise desirerent du sieur de Veruins, que le droit qu'auoit Monsieur de Rheims leur fils sur ledit Archeuesché de Narbonne, fust transferé en la personne du sieur de Rebé.

Quelle obligation à vn seruiteur de se voir ainsi comblé de bienfaits, porté à vne dignité inespérée, subrogé à la place de son maistre, & de voir que la recôpense preuenoit ses seruices.

Or il ne fut pas bien aisé de disposer à cela ledit sieur de Veruins, non pas qu'il manquast de gratitude enuers ses bienfaiteurs, ny pour aucun dessein qu'il eust de s'opposer aux volontez de Monsieur & de Madame de Guise qu'il recognoissoit tres-iustes: mais il esperoit de leur bienueillance, que ne pouuant auoir Monsieur de Rheims leur fils pour son successeur audit Archeuesché de Narbonne, ils luy accorderoient cette grace pour vn sien neveu qu'il auoit nourry, & élevé de sa main en la profession Ecclesiastique.

Tant ya, il n'obmet aucune persuation pour rendre la personne de son neveu preferable au sieur de Rebé; Mais en fin vaincu par la perseuerance de Monsieur & de Madame de Guise, il oublie les interests de son sang pour s'accommoder au choix qu'ils auoient fait; Escriit à Monsieur de Guise le 5. Avril 622. & par homme exprés luy enuoye de Narbonne la procuration qu'on auoit désirée de luy; par laquelle il nomme le sieur de Rebé pour Coadiuteur, & son successeur audit Archeuesché, avec vn entretenement de trois mil six cens liures par chacun an pendant la vie du sieur de Veruins.

Comme cette procuration fut arriüée à Paris entre les mains de Monsieur de Guise, qui auoit eu la parole & l'assurance du Roy long temps auparauant pour agréer l'affaire, &

en sa consideration il remet & confie au sieur de Rebé le soin des expéditions nécessaires, croyant qu'après tant de bienfaits il y apporteroit la fidelité que doit vn seruiteur à son maistre.

Sur cette confiance, on ne s'est iamais enquis ny de la forme, ny de la teneur du breuet qu'auoit eu le sieur de Rebé, lequel pour paroistre zelé au seruice de son maistre, entreprit vn nouueau voyage à Rome, sous pretexte d'obtenir les Bulles, & prouisions des Benefices qui auoient vacqué par la mort de Monsieur le Cardinal de Guise; mais en effect c'estoit pour auoir ses Bulles de la Coadiutorerie de Narbonne aux despens de Monsieur de Rheims, par la faueur & recommandation que l'employ de son seruice luy donnoit auprès du Saint Pere.

Ces Bulles estant obtenues, & le sieur de Rebé créé Coadiuteur sous le tiltre d'Archeuesque d'Heraclee, il continua de prendre ses gages en qualité de Chef du Conseil dudit Seigneur de Rheims, bien que sa commission eust cessé dès l'année six cens vingt deux.

Six ans apres, & en Feurier six cens vingt huit, le sieur de Veruins estant decédé, le sieur de Rebé son Coadiuteur entre en la iouissance actuelle dudit Archeuesché de Narbonne: Mais ébloüy de l'esclat de cette dignité, il perdit en peu de temps la souuenance de sa premiere condition.

Son esprit se laissa charmer à l'opulence du reuenu; il n'y auoit point de meubles qui fussent assez precieux pour luy; dresse vne grande maison, avec plus de train & d'equipage que son maistre.

Cependant comme il est question d'acquitter sa foy pour le payement de ladite pension que le sieur de Rebé scauoit estre constituée sur son Archeuesché dès ladite année six cens seize, & de laquelle il auoit luy-mesme sollicité l'expédition en Cour de Rome, il porte l'affaire en longueur, suppose des charges imaginaires qui excedoient la valeur dudit benefice, feint des excuses sur la sterilité du temps, & le malheur de la contagion.

Pour ces considerations Monsieur de Rheims presenta sa Requeste au Conseil le 4. Mars 630. sur laquelle il fist assigner le sieur de Rebé, afin de se voir condamner à luy payer ladite

pension de trente mil liures créée à son profit du consentement du Roy, & par autorité du S. Pere : ensemble les arrearages escheus depuis qu'il estoit entré en la possession réelle dudit Archeuesché de Narbonne, suiuant & conformément à ladite signature de Cour de Rome.

Sur cette assignation les parties ayant respectiuellement comparu, & la cause retenüe par Arrest contradictoire. Comme le sieur de Rebé vist sa pretension deplorée, & sans defense parmi les gens de bien.

Après auoir esté interrogé sur faits & articles pertinens, Dieu luy toucha le cœur, & inspirant au sieur de Rebé la verité qu'il auoit déniée à la face de la Iustice, non seulement contre l'euidence publique, mais mesmes contre sa propre science, & conscience, le fist resoudre en vn moment à passer condamnation de sa faute, & donner les mains à la iuste poursuite que Monsieur de Rheims auoit intentée contre luy.

Pour cét effect le sieur de Rebé s'adressa à Monsieur de Thou Conseiller au Parlement de Paris, & le pria de faire agreer par Monsieur & Madame de Guise, les submissions qu'il desiroit leur rendre, & l'acquiescement qu'il vouloit subir à la signature de Cour de Rome, portant creation de ladite pension.

Et pour donner vne assurance entiere de la parole qu'il faisoit porter, il en bailla vn escrit de sa main audit sieur de Thou, pour estre porté de sa part à Monsieur & à Madame de Guise, qui ayans veu cét escrit furent à la verité tres-aises de trouuer en son deuoir vn seruiteur qu'ils auoient si sensiblement obligé, & que de son propre mouuement, il eust reconnu la faute qu'il auoit commise en leur endroit. Mais ils firent entendre audit sieur de Thou, que la simple declaration & recognoissance du sieur de Rebé ne suffisoit pas pour assurer à Monsieur de Rheims ladite pension : car puis qu'il y auoit instance sur la validité d'icelle, il falloit necessairement vn Arrest qui confirmast sa demande, & terminast le procès.

Que fait alors le sieur de Rebé, pour tesmoigner la resolution qu'il auoit prise sur ce sujet ; Il void Messieurs les Presidens, & Monsieur l'Aduocat General, auxquels il confirme ce qui s'estoit passé, & leur dit qu'il consentoit au profit de
Monsieur

9

Monsieur de Rheims vn Arrest tel que bon luy sembleroit, pour la seureté de ladite pension.

Là dessus on communique les pieces à Messieurs les Gens du Roy, qui voyent les breuets de sa Majesté, desquels il a esté fait mention ey dessus, la procuration du sieur de Veruins pour consentir la creation de ladite pension, la signature de Cour de Rome, & les responses categoriques du sieur de Rebé.

Depuis, la cause ayant esté appelée, apres que son Aduocat & Procureur eurent déclaré en audience qu'ils ne vouloient empescher les fins & conclusions prises au procès par Monsieur de Rheims, ouy le consentement de Monsieur l'Aduocat General, & lecture publiquement faite desdites pieces. Interuint Arrest contradictoire le trentiesme iour d'Auril mil six cens trente, par lequel le sieur de Rebé est condamné payer ladite pension de trente mil liures par chacun an, suiuant & conformément à ladite signature de Cour de Rome, ensemble les arrerages escheuz, & continuer à l'aduenir le payement d'icelle sur tous & chacuns les fruits dudit Archeuesché de Narbonne, lesquels à cette fin ne pourront estre baillez à ferme qu'en presence de Monsieur de Rheims, ou de ses Agens, & Procureurs, & à la charge que les Fermiers demeureront obligez au payement de ladite pension.

Après ledit Arrest, on fist deux conferences pour en faciliter l'exécution: esquelles le sieur de Rebé fut requis de déclarer franchement quel estoit le reuenu, & la veritable valeur dudit Archeuesché de Narbonne; afin que sur ce pied on peust liquider & asseurer ce qui resteroit à Monsieur de Rheims pour ladite pension, après les charges acquittées, & le titulaire payé.

On luy proposa de passer par l'aduis, & decision de tels banquiers qu'il voudroit luy mesme nommer, pour estimer les cinq mil escus d'or en or, qui luy sont attribuez par ladite signature, afin qu'il touchast par preference, & avec exemption de toutes charges, les sommes à quoy reuiennent lesdits cinq mil escus d'or selon le cours de nostre monnoye.

Et pour liquider les charges dudit Archeuesché de Narbonne, on apporta les comptes qui auoient esté rendus à feu-

10
Monsieur le Cardinal de Loyeuse reservataire des fruits, où elles sont toutes exprimées & arrestées.

On offrist de passer lesdites charges suiuant qu'elles seroient allotiées esdits comptes, avec les augmentations suruenues du depuis, soit pour les decimes ou autre chose, pourueu qu'elles fussent raisonnables & iustificées.

On fist dauantage, parce que traittant amiablement, & par la voye d'honneur ce qui estoit à faire en execution dudit Arrest, on fist esperer au sieur de Rebé qu'il auroit grace de Monsieur de Rheims pour vne partie des arrerages escheuz & adiugez; qu'il luy en remettroit iusques à la moitié, pourueu qu'il fust assuré d'estre payé dans vn an, & sans retardement du courant de ladite pension.

Mais sur tous ces poincts, quel fut le procedé du sieur de Rebé? Inconstance, & illusion: il refuse apres ledit Arrest ce qu'il auoit tesmoigné desirer auparauant avec ardeur.

Il ne veut nommer ny conuenir d'aucun banquier pour estimer lesdits cinq mil escus d'or en or, qui luy sont affectez par ladite signature.

Quand au reuenu dudit Archeuesché de Narbonne, qui vaut notoirement plus de soixante mil liures par chacun an; il veut faire croire par ses suppositions ordinaires, qu'il ne peust excéder quarante cinq mil liures, suiuant le bail qu'il en auoit fait, surquoy il feint des charges imaginaires pour en absorber plus de la moitié, supprime les contrelettres qu'il auoit prises portant supplément de plus grande somme, les réserves, & les gratifications qui montoient plus de huit mil liures tous les ans, tellement qu'à son compte ladite pension estoit reduite à neant, & ledit Arrest du Conseil demouroit illusoire, & sans fruit à Monsieur de Rheims.

Comme donc on recognoist cét artifice, & l'illusion affectée du sieur de Rebé, par le moyen de laquelle il se rendoit indigne de la grace de Monsieur de Rheims, & estoit hors d'esperance de le pouuoir reduire à la raison; on est contraint d'agir contre luy par la rigueur dudit Arrest, on fait saisir entre les mains des Fermiers tout ce qu'ils pouuoient deuoir du pris de leurs baux pour le payement des arrerages escheuz, & pour le courant de ladite pension.

Mais le sieur de Rebé y auoit mis bon ordre, car il auoit pris par auance tout ce qui estoit deub par lesdits Fermiers : & neantmoins pour auoir pretexte de faire vn nouveau procès à son bienfacteur, il s'est pourueu par requeste audit Conseil, afin d'estre receu opposant à l'exécution dudit Arrest, & incidemment a pris lettres en forme de requeste ciuile, pour estre remis & restitué en tel estat qu'il estoit auparauant.

C'est en somme l'estat de la cause, & le merite des instances qui sont à iuger.

Reste de monstrier que l'opposition du sieur de Rebé est sans fondement, & qu'il doit estre debouté de ladite requeste ciuile comme vn temeraire plaideur. Par apres il sera respondu aux obiections qui ont esté faites touchant l'establissement, & la validité de ladite pension.

Premièrement il est inotuy, & sans exemple qu'une partie soit receuable à se plaindre d'un Arrest donné par acquiescement, parce que ce seroit venir contre son propre faict, & rompre le sacré lien de la société ciuile, qui est la foy, ce que les loix n'ont iamais voulu permettre ny autoriser.

Il n'y a point de condamnation plus legitime, ny plus assurée dans l'ordre de la Iustice, que celle que nous subissons volontairement, & où le iugement secret de la conscience nous porte.

L'Arrest duquel le sieur de Rebé se plaint, est de cette qualité. Mais il y a plus, d'autant que c'est vn Arrest d'audience, où il a esté oüy par le ministère du mesme Aduocat & du mesme Procureur qui occupent à present pour luy ; Il n'y a point de defadueu formé contre le consentement qu'ils ont presté, & qui a donné lieu audit Arrest ; Il est donc impossible de le retracter ; parce que la chose implique contradiction, qu'on puisse à la requeste du sieur de Rebé reuoquer ce qu'il approuue, ny destruire sur sa poursuite vn consentement qu'il recognoist auoir esté fait par son adueu, & suiuant la charge qu'il en a baillée.

Contre ce moyen, on a repliqué que ledit Arrest n'estoit pas interuenue sur l'acquiescement pur & simple du sieur de Rebé : mais, dit-on, en consequence d'un precedent traitté, & de la parole qu'on luy auoit donnée, que nonobstant ledit

Arrest, on subiroit le iugement des Prelats, & des Docteurs qui seroient conuenus de part & d'autre pour decider la question touchant la validité de ladite pension.

Qui a iamais ouy parler d'une ouuerture de restitution semblable à celle-cy, ny d'un moyen de requeste ciuile si extrauagant?

Le sieur de Rebé veut ébranler la force, & l'autorité d'un Arrest par un mensonge: de quel front peut-il auancer à la face de la Iustice ce qui n'est point, & dont la seule proposition est pleine d'absurdité & d'impertinence?

Il faut, disoit un Ancien, qu'és alleguations qu'on veut faire passer pour veritez en iugement, il y ait au moins quelque apparence de vray, *Commodè fingenda sunt quæ verè dici non possunt.*

Et le Iuriconsulte a respondu fort à propos en une de nos loix; *Confessionibus, & asseuerationibus in iudicio factis ita demum stari debere, si quod in iis deductum est, ius, & naturæ pati possint.*

Or le fait que le sieur de Rebé met en auant marque apparemment sa supposition conuaincuë, & condamnée par son propre escrit: mais il fait bien dauantage, car il combat le sens commun.

Il n'y a iamais eu traitté ny conuention entre les parties, promesse, ny paction aucune pour le subiet de ladite pension. Mais pour sçauoir la verité de ce qui s'est passé, il est necessaire de prendre, que le sieur de Rebé ayant esté interrogé pardeuant Monsieur Lanier Doyen du Semestre d'Esté, eut horreur des parjures qu'il auoit commis par ses responses, & d'auoir dénié apres serment solennel ce qui estoit constant & iustifié contre luy, recogneu le peu d'apparence qu'il y auoit en ses pretensions.

Pour cet effect le 23. dudit mois d'Auril 630. septiours auparavant ledit Arrest, il alla trouuer ledit sieur de Thou au Palais, pour le prier de luy faire office enuers Monsieur & Madame de Guise, afin de receuoir les submissions auxquelles il se sentoit obligé, & l'acquiescement qu'il vouloit faire à ladite pension, comme bien & canoniquement créée.

Et pour rendre l'entremise dudit sieur de Thou plus efficace, il luy fist voir un escrit contenant son intention, qu'il auoit dressé le mesme iour par l'aduis de son Aduocat.

Cet escrit ayant esté leu, & approuué par ledit sieur de Thou; le sieur de Rebé en mesme temps, pour tesmoigner l'impatient desir qu'il auoit de terminer vne affaire où il s'estoit embarqué mal à propos, le transcriuit de sa propre main dans vn Cabinet de la cinquiésme Chambre des Enquestes, & apres l'auoir signé le bailla audit sieur de Thou, pour le porter de sa part à Monsieur & à Madame de Guise, comme il a esté desia dit.

Mais pour faire voir le peu de foy qu'on doit adiouster aux paroles du sieur de Rebé: Depuis ladite requeste ciuile, il a esté interrogé derechef pardeuant Monsieur Charpentier, Conseiller audit Conseil.

Quand on luy a demandé: Si par ledit Escrit il n'auoit pas déclaré qu'il acquiesçoit à ladite pension, & ne vouloit reuoker en doute la creation d'icelle; il a dénié hardiment ce faict.

Et neantmoins voicy la teneur dudit Escrit, qui ne s'accorde pas avec la parole du sieur de Rebé, & le conuainc de parjure.

Je Claude de Rebé Archeuesque de Narbonne, ayant sceu que sa Saincteté a créé sur le breuet du Roy vne pension de trente mil liures sur l'Archeuesché de Narbonne, au profit de Monseigneur l'Archeuesque de Reims, & a seulement reserué cinq mil ducats de chambre d'or en or, pour celuy qui seroit pourueu dudit Archeuesché, ne desirant en rien contreuenir aux volontez de Messieurs le Duc de Guise, & de Madame la Duchesse sa femme, lesquels i'ay tousiours tenus tres-justes & raisonnables, & pour l'honneur & le respect que ie leur porte, & l'obligation que i'ay à leur maison: DECLARE QUE IE N'ENTENS REVOQVER EN DOVTE LA CREATION DE LADITE PENSION, me remets de l'exécution d'icelle à leur seule volonté, & ce qu'il leur plaira en ordonner, suppliant tres-humblement leurs Grandeurs de considerer quelle est la qualité de l'Archeuesché de Narbonne, le rang que ie tiens dans la Prouince, & les grandes despences que ie suis obligé de supporter. Faict à Paris, le 23. Avril 1630.

Cl. de Rebé Archeuesque de Narbonne.

La verité dudit Escrit recogneu par le sieur de Rebé au parquet de Messieurs les Gens du Roy, & en l'audience-publique du Conseil, descouure l'imposture qui sert de pretexte

à ladite requête civile, & monstre que c'est vne pure inuention, d'alleguer qu'on ait soumis au iugement d'aucun Prelat ny Docteur le differend de ladite pension : car à quel propos l'eust on fait, puisque le sieur de Rebé donnoit librement les mains, & acquiesçoit sans condition, à la signature de Cour de Rome portant creation d'icelle ?

Dauantage, il est absurde & contre le sens, qu'on eust songé à faire donner vn Arrest qui terminast le procès, & decidast la question sur la validité de ladite pension, pour remettre par apres la decision du Conseil à la censure des Prelats & des Docteurs, dont les parties conuiendroiet. Assujettir la Iustice souueraine du Roy à l'aduis de simples particuliers, qui n'ont ny caractere ny pouuoir, pour cognoistre de telles matieres ? & de quelle autorité l'eussent-ils peu faire ? & quel eust esté l'effect de leur iugement ?

On peut adiouster, que si par ledit Arrest, & le consentement que le sieur de Rebé y a presté confirmatif de ladite pension, il n'eust creu sortir entierement d'affaires, il est sans doute qu'il n'eust pas rendu les pieces de l'induction desquelles il se veut aider, & les eust conseruées pour debattre pardeuant lesdits Prelats, & Docteurs imaginaires la validité de ladite pension.

Voila quelles sont les suites, & accidens du mensonge ? c'est vn abyfme d'absurditez ; vne supposition attire l'autre, *velut vnda superuenit vndam.*

De tout ce discours il faut recueillir, que puisque ledit Arrest du Conseil, contre lequel le sieur de Rebé s'est pourueu, n'a fait que confirmer la condamnation volontaire qu'il a subie par deux actes geminez ; l'vn est le consentement mentionné par ledit Escrit ; l'autre est celuy qu'il a fait iudiciairement.

Par tous ces deux actes, il a déclaré qu'il acquiesçoit à la signature de Cour de Rome, portant creation de ladite pension au profit de Monsieur de Rheims : or le Conseil n'a ordonné que cela, & l'Arrest qui condamne le sieur de Rebé, suiuant & conformément à ladite signature, ne iuge autre chose que la validité d'icelle ; par ainsy il est impossible par toutes les regles & maximes que nous pratiquons, que le sieur de Rebé

puisse estre restitué contre ledit Arrest.

Les declarations qui se font en iugement, sont autant de contractz publics & solennels, *in iudicio quasi contrahimus*, dit la loy, s'il estoit loisible de reslir contre ces actes, ce seroit illuder impunément l'autorité publique de la Iustice.

Il y a deux ans qu'un Chanoine de Limoges fut assigné en complainte sur le possessoire d'un Benefice qui estoit contentieux au Conseil: Il donna charge à son Procureur de declarer qu'il n'y pretendoit plus rien, & en abdiqoit le droict au profit de celuy qu'il plairoit audit Conseil de maintenir.

Quelque temps apres il s'aduifa de prendre lettres en forme de requeste ciuile, pour estre restitué contre sa declaration, & l'Arrest de maintenue donné en consequence: Par Arrest contradictoire donné en audience il en fut debouté, & condamné aux despens. Pourquoi? pour l'illusion qu'il vouloit faire à la Iustice.

On sçait que par la police de l'Eglise, & la doctrine des saints Decrets, il n'y a rien si indecent, ny si contraire à la profession Ecclesiastique que la variation, *Clement. cum illusio. de renunciat.*

Pour cette consideration les regrés des Benefices ont esté defendus. Quand un Ecclesiastique s'est vne fois démis de ses pretensions, qu'il a renoncé à son droict, il n'y rentre plus.

Tesmoin l'exemple d'Esau qui ne peut reprendre son droict de primogeniture apres l'auoir quitté pour vne escuelle de lentilles.

Saint Cyprien traite elegamment ce poinct au liure qu'il a fait *ad Iubaianum de Hæretico baptisandis*, d'où est tiré le Canon, *quàm periculosum 7. q. 1. Quàm periculosum*, dit-il, *in diuinis vt quis iure suo cedat, quod Esau primatus suos inde perdiderit, nec recuperare postmodum potuerit.*

Nous lisons dans le Prophete Ezechiel, que les Cherubins & Seraphins qui tiroient le coche de la diuinité, regardoient tousiours deuant où l'esprit les pouffoit, sans se tourner arriere, pour nous enseigner que l'autel, & les sacrifices n'admettent point l'inconstance, ny la variation.

Et si elle est interdite à toutes sortes d'Ecclesiastiques generally, elle l'est encore plus à un Archeuesque, qui te-

nant les premiers rangs de la maison de Dieu, doit tesmoigner par son exemple qu'il imite de près le Maistre qu'il sert, expliqué par ces paroles, *Ego SVM DEVS, ET NON MVTOR*, & duquell'Escripture dit, *verbum Domini manet in aeternum*.

Après auoir iustificié comme le sieur de Rebé est du tout non receuable en ladite requeste ciuile, & qu'il est impossible de le restituer contre l'Arrest dont il se plaint, attendu les consentemens qu'il y a prestez par écrit, & en iugement; sans se departir de cette fin de non receuoir, par laquelle le different dont il s'agist doit estre iugé à l'auantage de Monsieur de Rheims, il faut monstrier par le merite du fonds que ladite pension est tres-canonique, & qu'on ne pouuoit y apporter autre decision que celle qui est prononcée par ledit Arrest.

En premier lieu, il est raisonnable de considerer la qualité du sieur de Rebé, qui plaide à present contre Monsieur de Rheims, & luy controuerse sans sujet ladite pension; Vn domestique esleué par ses bienfaits, auquel il a procuré la dignité qu'il possède, & qui ne la pouuoit auoir que par son moyen, & cependant au lieu d'acquitter sa foy, & payer à son bienfaiteur la pension qu'il a promise sur le Benefice qu'il tient de luy, il la luy veut faire perdre par cauillation:

N'est-ce pas en cét endroit qu'il faut s'escrier avec le Psalmiste: *Homo pacis qui edebat panes meos magnificauit super me supplantationem!*

Lors que le sieur de Rebé entra au seruice de Monsieur de Rheims, & dans ses affaires, il n'auoit autre qualité que de simple Chanoine de saint Iean de Lion; il a esté subrogé pour auoir le tiltre dudit Archeuesché de Narbonne, qui appartenoit à Monsieur de Rheims son maistre, c'est par la faueur de Monsieur son pere, & la recommandation de ses seruices que le sieur de Rebé de Chanoine est deuenu Archeuesque, il scauoit la charge réelle qui estoit imposée auparauant, & ne la pouuoit ignorer; il a pris le Benefice avec cette charge, & ne l'eust point eu autrement, c'est à dire, sans l'assurance & la foy qu'il a donnée d'acquitter ladite pension: comment donc se peut-il liberer d'une chose à laquelle il s'est obligé si estroitement?

De verité, il faut auoüer que par les Canons, le droit des Benefices

Benefices est sacré, & public, & n'est pas loisible de les attacher aux liens des obligations priuées : Mais l'equité des Cours souueraines a voulu, & les Arrests y ont passé, que quād il s'agist de la bonne foy que doit vn seruiteur à son maistre, elle doit preualoir toutes les regles de Droit, toutes les maximes, & constitutions de police.

Iusques là, que par l'Arrest celebre de la Cure des Innocens, & par infinis semblables donnez au Conseil, & en tous les Parlemens de France, on a iugé qu'il estoit plus expedient de tolerer vn abus dans l'Eglise, de souffrir le regrés en matiere beneficiale, quoy que prohibé par les saincts Decrets, que d'autoriser la perfidie d'un seruiteur contre son maistre.

Il seroit à desirer que l'estat, & la necessité de la cause peussent permettre sans preuariquer, de parler en autres termes dans la condition presente du sieur de Rebé, mais c'est comme sieur de Rebé seulement, non pas en qualité d'Archeuesque de Narbonne, qu'il est argué de manquement de foy, parce que ce defect luy auroit fermé l'entrée de sa dignité, *Domine quis habitabit in tabernaculo tuo? qui loquitur veritatem in corde suo, qui non egit dolum in lingua sua.*

Mais examinons quelle est la responce du sieur de Rebé, pour éluder ce moyen? Il a dénié auoir seruy domestiquement Monsieur de Rheims, & a dit contre verité selon sa coutume, que les gages qu'il auoit touchez luy estoient ordonnez par forme d'entretienement sur les Benefices desquels il auoit esté cy deuant Administrateur, & Vicaire general.

Hé quoy? le sieur de Rebé peut-il desaduouier sans rougir vne condition qui luy a esté si vile, & si honorable, la cause de son bonheur, & de son eleuation?

On ne reuoque point en doute la qualité qu'il dit auoir eu d'Administrateur, & Vicaire General: Mais s'il a pris la peine de lire sa Bulle, il trouuera que ç'a esté par le consentement de Monsieur de Guise qui l'auoit nommé, & proposé pour cela au Roy & au Pape.

Au surplus, cette qualité a cessé en sa personne dès l'année six cens vingt deux, & depuis ce temps iusques en six cens vingt huit, qu'il est entré en la iouissance actuelle dudit Archeuesché de Narbonne, voire mesme deux ans auparauant,

qu'a-il esté sinon seruiteur à gages de Monsieur de Rheims? employé dans les estats de sa maison à douze cens escus d'appointement par chacun an, non pas en qualité d'Administrateur, & Vicaire general, mais comme Chef de son Conseil? On luy a fait recognoistre pour dix mil cinq cens escus de quittances des gages qui luy ont esté payez en cette qualité, & feroit aisé d'en rapporter d'autres, mais celles là ne sont que trop suffisantes pour establir, & asseurer la verité qui se trouue directement opposée au sieur de Rebé en toutes les circonstances de ce procès.

Or voicy vne occasion signalée où ses suppositions sont destruites, & sa mauuaise foy tellement recogneuë, qu'il n'y a point d'artifice qui la puisse couvrir ny excuser.

Interrogé par serment pardeuant Monsieur Lanier: s'il n'estoit pas à Rome le septiesme d'Octobre six cens seize lors que ladite pension fut créée, & s'il n'auoit pas sollicité l'expedition de ladite signature, portant creation d'icelle.

Il a respondu par vn insigne parjure, qu'il estoit party de Rome dès le mois de Septembre auparauant, & toutesfois il y a preuue au procès par lettre de Monsieur le Marquis de Trenel Ambassadeur, qu'il estoit encore à Rome le 23. dudit mois d'Octobre, seize iours apres l'expedition de ladite signature, de laquelle il auoit esté solliciteur auprès du Saint Pere, comme enuoyé pour les affaires de Monsieur de Rheims, & à ses despens.

Ce qui est iustificié d'abondant par les parties de Prouancheres Banquier de Lion, arrestées & acquittées par le mesme sieur de Rebé le 19. Iuin 617.

Dauantage, lors qu'on l'a fait interroger; S'il n'estoit pas vray que Monsieur & Madame de Guise luy auoient procuré ledit Archeuesché de Narbonne, & qu'ils auoient eu beaucoup de peine pour y faire resoudre le sieur de Veruins son resignant, lequel desiroit cét establissement pour vn sien neveu capable de luy succeder.

La responce qu'a fait le sieur de Rebé sur cét article a esté, qu'il n'estoit point venu à sa cognoissance que Monsieur ny Madame de Guise eussent contribué aucune chose pour luy faire obtenir ledit Archeuesché de Narbonne.

Mais la lettre du sieur de Veruins escrite à Monsieur de Guise, en luy enuoyant sa procuration pour nommer le sieur de Rebé son Coadiuteur, & futur successeur audit Archeuesché de Narbonne conuainc la supposition, & marque la mauuaise foy de ladite response.

Le Conseil prendra donc, s'il luy plaist, la teneur de ladite lettre, qui porte vn tesmoignage de verité solennel & irreprochable pour cét effect, puisque le sieur de Rebé luy mesme en est demeuré d'accord au procès, & l'a recogneuë pardeuant Monsieur le Commissaire qui l'interrogeoit.

MONSEIGNEUR,

Il vous plaira voir par celles que le sieur de Vires escrit à vostre Grandeur, combien vos commandemens ont de pouuoir sur toutes mes volontez; puis qu'en vne affaire qui n'importe pas moins qu'un tres-grand peril du salut, & perte de l'ame, j'ay (apres auoir prié, & fait prier Dieu de m'assister par son Sainct Esprit) tres-volontiers acheué ce que vostre Grandeur desiroit de moy, & nommé pour Coadiuteur, & successeur, celuy qu'il vous a pleu me recommander, preferant en cela vos commandemens, comme ie feray tousiours, à la naturelle affection, & inclination que la chair & le sang ont emprainte sur les hommes, de procurer s'ils peuuent à leurs proches parens telles charges, quand ils en ont de la qualité requise, ainsi que j'en ay par la grace de Dieu, qui heriteront à l'affection que ie me suis inuolablement conseruée à vostre seruice; la consideration desquels neantmoins, n'empeschera iamais que ie n'embrasse de cœur & d'ame tout ce qui sera de vos volontez, & contentemens, comme celuy qui desire se conseruer iusques au tombeau, MONSEIGNEUR,

*Vostre tres-humble, tres-obeissant,
& tres-fidelle seruiteur,*

De Narbonne ce 5.
Auril 1622.

L. DE VERVINS Archeuesque de Narbonne.

Il n'est pas besoin d'apporter aucun commentaire à ladite lettre, car elle parle trop clairement: mais là dessus on peut obseruer ce que dit S. Thomas en la question 107. 2. 2. Qu'il y a parmi les hommes trois degrez d'ingratitude: le premier, gist au manquement de retribution enuers le bienfaicteur: le second, quand on dissimule le bienfait receu: mais le trois-

iesme, & le pire de tous est, quand on le dénie.

A ce propos, il se trouue vne excellente meditation de Rupert sur ces paroles de la Genese, *Initio creauit Deus caelum & terram*. Pourquoy, dit-il, est-ce que Dieu n'a pas fait mention du feu, qui est le premier, & le plus noble de tous les Elements, & s'est souuenu de la terre qui est le plus bas? pour nous apprédre comme il faut à son exemple detester l'ingratitude.

La Terre par sa production continuelle tesmoigne à Dieu sa gratitude; c'est pourquoy elle a merité la souuenance de son Createur: mais il n'en est pas ainsi du feu, qui est le symbole de l'ingratitude, parce qu'au lieu de produire, & retribuer quelque chose, il consomme la matiere qui luy est appliquée, comme l'ingrat perd facilement la memoire des bienfaits receuz.

Mais il est besoin de respondre à l'obiection que fait le sieur de Rebé: Qu'il a eu son breuet du Roy pour estre Coadiuteur, & futur successeur dudit Archeuesché de Narbonne, sans l'intercession de Monsieur de Guise, & sans aucune charge de ladite pension.

A quoy il est respondu, que c'est vn iuste secret de la prouidence de Dieu, de permettre bien souuent que les artifices pratiqués pour couvrir vne mauuaise action, ont vn effect contraire à l'intention de leur auteur.

Le sieur de Rebé peut-il auoir cette presumption de vouloir faire croire, que le Roy l'eust consideré pour ledit Archeuesché de Narbonne, sans la priere, & recommandation que Monsieur de Guise luy en auoit faite auparauant? Peut-il tomber dans la pensée d'un esprit raisonnable, que sa Maiesté eust disposé en sa faueur dudit Archeuesché, au preiudice de la grace qu'elle en auoit faite à Monsieur de Guise par deux breuets precedens? Et luy mesme sieur de Rebé y eust-il osé songer estant seruiteur à gages de sa maison, si Monsieur de Guise ne l'eust eleué à cette dignité, par la faueur de son nom, & le merite de ses seruices?

Au surplus pour ce qui est dit, que par ledit breuet du sieur de Rebé, il n'est point parlé de ladite pension; c'est vn point qui aggraué son ingratitude, & condamne sa mauuaise foy: il sçauoit que ladite pension auoit esté créée six ans auparauât,

il en auoit luy mesme fait faire l'expedition estant à Rome pour les affaires de Monsieur de Rheims, & à ses despens, comme il a esté monstré cy deuant.

Si donc en faisant dresser ledit breuet, il a malicieusement obmis d'y comprendre ladite mention, c'est vn dol personnel duquel il ne peut tirer aucun auantage; la confiance qu'on auoit prise en luy, le soin que Monsieur de Guise luy auoit laissé de cette expedition l'obligeoit d'en vsfer plus loyalement.

Et dès lors auoit-il ce dessein en l'ame de vouloir circonuenir son bienfaicteur, en receuât de luy la grace qu'il luy a faite.

Mais pour faire voir que les artifices du sieur de Rebé sont vains, & sa mauuaise foy sans effect, l'obmission portée par ledit breuet n'est d'aucun preiudice à Monsieur de Rheims, d'autant que son droit luy estoit acquis six ans auparauant, sa pension créée dès ladite année six cens seize du consentement du Roy, & par autorité du Sainct Pere; d'ailleurs c'est vne charge réelle qui suiuoit le tiltre dudit Archeuesché de Narbonne en quelque main qu'il peust passer, & qui ne se peust esteindre que par la mort, ou desistement du pensionnaire.

On obiecte vn autre moyen du sieur de Rebé.

Que ladite pension ne peut estre canonique, comme ayant esté créée sans cause, parce qu'apres la mort de Monsieur le Cardinal de Ioyeuse, la reserue des fruits qui luy appartenoit auoit pris fin, & le tiltre dudit Archeuesché de Narbonne demouroit exempt, & liberé de cette charge: Tellement, dit-on, qu'il n'estoit pas au pouuoir du sieur de Veruins titulaire, de donner aucun consentement valable pour imposer ladite pension au preiudice de ses successeurs.

On adioust, que la procuration qu'il a passée pour consentir en Cour de Rome la creation d'icelle, est nulle & frauduleuse, à cause que le mesme iour, Monsieur & Madame de Guise luy firent vne promesse particuliere, qu'il seroit deschargé sa vie durant du payement de ladite pension.

Il faut examiner tous ces points, & y respondre.

Premierement, il ne peut estre dit avec raison, que ladite pension soit créée sans cause, puisque Monsieur de Rheims auoit vn breuet du Roy qui continuoit en sa personne la mesme reserue des fruits dudit Archeuesché de Narbonne, dont

iouïssoit feu Monsieur le Cardinal de Joyeuse son grãd oncle.

Au contraire, la subrogation de ladite pension au lieu de ladite reserve, est vn changement canonique, auantageux pour l'Eglise, & pour tous les titulaires dudit Archeuesché de Narbonne, pendant la vie dudit Seigneur de Rheims: car au lieu que lesdits titulaires n'auoient que quatre mil cinq cens liures d'entretienement durant ladite reserve, ils ont cinq mil escus d'or en or par l'establissement de ladite pension.

Et de dire que cette reserve ne pouuoit estre continuée, principalement en faueur d'un Prince destiné à la profession Ecclesiastique, & contre vn titulaire qui s'estoit contenté l'espace de treize ans d'un entretienement de quinze cens escus par chacun an; c'est disputer contre l'vsage public de l'Eglise, & ce que nous auons veu pratiquer en France.

Y a il rien de plus frequent en Italie, & dans le pais d'obediencia, que les continuations des reserves, notamment par la mort de Messieurs les Cardinaux?

Nous en auons deux exemples signalez en ce Royaume, pour Messieurs les Cardinaux de Tournon & de Ferrare, qui ont iouï de cette grace par la faueur de nos Rois, & la permission du Saint Siege.

Le Conseil void donc, que quand il n'y auroit eu autre cause pour créer ladite pension, qu'afin d'euitier l'effect dudit breuet, & que la continuation de ladite reserve ne fust canonisée par le Saint Pere, elle est legitime, & suffit.

Mais il y a plus; car les pensions imposées pour Messieurs les Cardinaux, & Messieurs les Princes sont si fauorables, & priuilegiées, que c'est pecher contre la decence, & les Constitutions de l'Eglise, de les vouloir enfermer dans les regles de la police commune.

Il est de la nature des pensions de finir, & s'esteindre par la mort du pensionnaire; neantmoins on a iugé au Conseil du Roy en faueur de Monsieur le Cardinal de Sauoye, que la pension de huiët mil escus par chacun an créée sur l'Archeuesché d'Auch au profit de Monsieur le Duc de Nemours, depuis rachetée par le feu Roy, & transferée à Messieurs les Cardinaux Gallo, Vincense, & Delphin, seroit continuée par leur mort audit Seigneur Cardinal de Sauoye, & le sieur Ar-

cheuesque d'Auch condamné de la luy payer par Arrest du quatriesme Iuin six cens vingt six, donne au rapport de Monsieur le President de Lauzon.

Dauantage, il est notoire à vn chacun que Monsieur le Duc de Cheureuse, qui est laïque & marié, a cinquante mil liures de pension par chacun an, dont il iouit paisiblement & sans controuuerse par Breuet du Roy, & Bulles du Pape, sur les Benefices de Monsieur de Rheims son neveu; Pourquoy? parce qu'il est Prince.

Mais la faueur est bien plus grande pour les Princes qui ont embrassé la profession Ecclesiastique; car à ceux là les Saints Decrets portent notamment, qu'il faut relascher la rigueur du droit commun.

Au chapitre *De multa. de præbend. & dignitatibus*, par l'extravagante *Execrabilis* du Pape Iean xxii. qui ont defendu la pluralité de Benefices en vne mesme personne, les Princes en sont exceptez, *ut pote*, dit le texte, *qui propter sublimitatem eorū, & generis claritatem potioris sunt prærogatiua gratia attollendi.*

De mesme par la pragmatique Sanction, & encore par le Concordat, qui est vne conuention publique entre le Saint Siege, & nos Rois, lors qu'on a réglé le temps d'estude, l'âge, & les autres choses qui sont necessaires pour entrer aux dignitez, & Prelatures de l'Eglise; il y a vne exception particuliere pour les enfans des Rois, & pour les Princes, en faueur desquels tous ces obstacles sont leuez.

Et si nous voulons penetrer la raison de cette iurisprudence, qui peut douter que la faueur d'estrené Prince est premierement conceüe au Ciel, puis communiquée avec le temps, pour executer par ce moyen les conseils, & les iugemens de la prouidence eternelle?

De là vient, selon la doctrine de quelques Theologiens, que Dieu leur donne des Anges d'un ordre superieur pour veiller sur leurs testes, & assister à leurs actions; de maniere que quād ils se presentent pour seruir l'Eglise, y porter l'appuy, & l'ornement de leur naissance, elle leur depart liberalement ses graces, & ses facultez.

Il y a vne autre raison pour cela; c'est, que toutes les richesses de l'Eglise sont prouenuës de la liberalité des Rois, & des

Princes; ce sont eux qui ont fondé, & doté les grands Bénéfices, & par ainsi, lors que les personnes de cette condition embrassent la profession Ecclesiastique, que font-ils autre chose que rentrer dans leur heritage? d'où il est raisonnable qu'ils prennent les preciputs, & les auantages de leur qualité.

De cette induction il faut inferer que la condition de Monsieur de Rheims, & l'honneur qu'il a d'estre Prince lié à la profession Ecclesiastique, mettent hors de doute la creation de ladite pension.

Mais de quelle grace peut-elle estre disputée par le sieur de Rebé, apres les consentemens solennels & reiterez qu'il a prestez à l'execution de ladite pension?

Outre qu'il est resignataire en faueur de celuy qui l'a consentie, son successeur au tiltre, & au droict dudit Archeuesché de Narbonne, & comme son heritier *in re sacra*, par consequent tenu de ses faits & promesses, obligé au payement de ladite pension par le fait de son resignant, ainsi qu'il a esté iugé par infinis Arrests donnez en pareil cas.

On peut adiouster, que le sieur de Rebé y est encore personnellement obligé par son propre fait, par l'acceptation qu'il a faite dudit Archeuesché de Narbonne de la main du Roy, & de l'autorité du Sainct Pere, qui ne l'ont fait Archeuesque, ny peu eleuer à cette dignité, qu'avec la charge recelle de ladite pension, qu'ils y auoient imposée auparauant.

Et le sieur de Rebé feroit-il receuable à reuoker en doute la puissance du Roy, & celle du Pape, de la grace & concession desquels il tient son establissement?

Par le Droict Ciuil en la loy *legatum. ff. de his quibus ut indiguit*, on a dénié toute action à celuy qui se veut pourueoir contre la disposition d'un homme dont il a receu quelque legs.

A plus forte raison, le sieur de Rebé ne peut estre receu à debattre ladite pension créée par la volonté du Roy, & l'autorité du Sainct Pere, d'autant que cette volonté, & cette puissance qui l'ont rendu ce qu'il est, sont plus obligatoires à son esgard, que la disposition du testateur à l'endroit de son legataire.

Reste de respondre aux pieces que le sieur de Rebé dit auoir rendues: & de la restitution on argumente contre luy mesme,

me, d'autant que c'est vn nouuel acquiescement qu'il a fait, vne execution volontaire qu'il a subie dudit Arrest, laquelle le doit faire debouter de ladite requeste ciuile.

En second lieu, cette restitution conuainc d'imposture le fait articulé par ladite requeste ciuile: car si le sieur de Rebé n'eust creu que ledit Arrest terminoit entierement la question de ladite pension, il n'eust pas rendu en suite d'iceluy les pieces qu'il estimoit luy deuoir seruir pour en disputer la validité.

Cette raison est si forte, qu'elle n'a point de response.

Mais il y a d'autres moyens pour opposer ausdites pieces. Quel auantage peut tirer le sieur de Rebé de la promesse qu'il allegue de Monsieur & de Madame de Guise, par laquelle ils ont voulu descharger le sieur de Veruins son predecesseur du payement de ladite pension sa vie durant, pour exciter le deuoir & la pieté de ce bon Prelat, à mettre ledit Archeuesché de Narbonne en bon estat, comme il a fait?

Les veut-il citer en iugement pour rendre raison de leur liberalité: La loy le defend: *Liberalitatis sua rationem nemo reddit*: & puis, n'est-il pas de la bienseance des Princes d'en vser ainsi? vn Ancien dit fort à propos, que l'eloquence d'un Orateur est, de persuader de parole, mais l'eloquence des Princes est, de persuader par bienfaits.

Il y a plus, c'est qu'au temps de ladite promesse, Monsieur & Madame de Guise par vn acte de pieté exemplaire, auoient remis & quitté aux Peres de l'Oratoire tout le reuenue des Benefices de Monsieur de Rheims.

Et le sieur de Rebé ne peut ignorer qu'ils leur ont fait payer apres ledit œconomat expiré, seize mil liures que lesdits Peres de l'Oratoire disoient auoir employé en œures pies par dessus le reuenue desdits Benefices.

Dauantage, le mesme sieur de Rebé n'oseroit dénier, que Monsieur & Madame de Guise n'ont iamais touché vn seul denier de tout le bien d'Eglise qui appartient à Monsieur de Rheims leur fils, & qu'ils ont pris vn soin tres-exact pour faire qu'il fust employé saintement pendant son bas âge.

La calomnie n'est pas assez forte pour donner atteinte à cette verité; iusques là qu'ils ont souffert que les fruits des Benefices de feu Monsieur le Cardinal de Guise fussent affe-

etez pour dix ans au payement de ses creanciers au preiudice de Monsieur de Rheims leur fils, qui en est le vray & canonique titulaire.

Et apres cela peut-on trouuer estrange qu'ils ayent remis, ou donné à vn Prelat septuagenaire la pension qui estoit à prendre sur luy, veu le peu de temps qu'il auoit à viure, par la presumption naturelle de son âge?

Consideré d'ailleurs qu'au temps de la signature de Cour de Rome, qui porte creation de ladite pension, Monsieur de Rheims pensionnaire n'estoit âgé que de trois ans, & ne pouuoit entrer en iouissance de ladite pension, sinon apres auoir pris la tonsure, c'est à dire quatre ans apres.

Quant à la protestation supposée, faite par le sieur de Veruins, contre le consentement qu'il auoit presté à la creation de ladite pension, & la lettre qu'on luy veut imputer prétendüe escrete à son successeur pour en empescher l'execution.

Le sieur de Rebé deuroit rougir de honte de se seruir de ces pieces; car si elles pouuoient estre de quelque consideration au procès, il seroit aisé d'en conuaincre la fausseté, qui est apparente par la confrontation des veritables feings du sieur de Veruins, recognus & auerez audit procès.

Ioinct, qu'il ne peut tomber dans le sens que ledit sieur de Veruins ait eul la pensée de faire aucune protestation contre ladite pension, de laquelle il auoit luy mesme donné les premieres ouuertes, & consenty si franchement qu'elle fust créée, non pas en lieu où sa liberté peust estre forcée, mais en presence du feu sieur de Monthelon, du Pere Archange Capucin, des sieurs du Val, & Gamache, Professeurs de Sorbonne, personnes de pieté, & d'integrité cognüe.

Au surplus, pour faire voir d'abondant la supposition grossiere desdites pieces, à quoy tendent-elles, si ce n'est pour tacher d'ingratitude la memoire du sieur de Veruins? On luy veut imposer qu'il n'a point eu agreable ladite pension, qu'il a exhorté son successeur de la disputer; or tant s'en faut que cela soit, qu'au contraire il appert par ladite lettre cy deuant transcrite & inserée, comme six ans apres la creation d'icelle, vsant de la gratitude qu'il deuoit enuers Monsieur de Guise, il luy a laissé la disposition entiere du tiltre dudit Archeuesché

de Narbonne, ayant nommé le sieur de Rebé pour Coadjuteur à l'exclusion de son neveu, & à la seule priere & recommandation dudit Seigneur Duc de Guise, laquelle luy a esté plus chere que les interets de son propre sang.

Il faut adiouster à tous ces moyens, que quand lescdites pieces seroient aussi veritables, comme elles sont fausses & supposées; elles ne peuuent estre considerées en Iustice: parce que les protestations qui se font apres vn acte fait & consommé, sont inutiles, & de nul effect.

Ladite pension auoit esté canoniquement créée dès le septiesme d'Octobre 616. le droit d'icelle estoit acquis à Monsieur de Rheims dès ce temps là, il auoit pour luy la volonté du Roy, & la grace du S. Pere: Par ainsi ce qu'on auroit protesté du depuis ne luy pourroit nuire, comme il n'est pas au pouuoir d'un resignant d'oster le droit acquis à son resignataire, apres que la resignatiō est accōplie, & admise par le Collateur.

Reste la derniere obiection touchant le pretendu excès de ladite pension.

Le sieur de Rebé veut faire croire qu'elle est onereuse, & excessiue: & pour cét effect, a communiqué plusieurs pieces inutiles, pour monstrier que ledit Archeuesché de Narbonne est subiet à beaucoup de charges.

Contre cette obiection il est respondu en premier lieu, que par la doctrine constante de tous les Canonistes, sans en excepter vn seul, nulle pension créée sur benefice par autorité du Saint Pere n'est reputée illicite, onereuse, ny excessiue, quand il reste au titulaire de quoy soustenir sa dignité.

C'est l'opinion de Gigas *in Tractatu de Pensionibus cap. 5.* de Felin sur le chap. *ad audientiam de re scriptis*, d'Abbas sur le chap. *Conquerente de Clericis non resid.* de Garfias *in Tract. de Benef.* de Rebuffe, de Flaminus, & generalement de tous les Casuistes, & Canonistes qui ont escrit de cette matiere.

Et cela est fondé sur l'equité naturelle, laquelle ne peut permettre qu'un homme sans incommodité soit receuable à se plaindre.

Mais cette question se trouue celebement agitée en l'assemblée du Concile de Trente sur la proposition qu'on y fist, d'ordonner que nul Benefice ne peut estre chargé de plus hau-

te pension que du tiers des fruits ou de sa valeur, suivant la coustume qui estoit lors que les pensions furent introduites.

Feu Monsieur le Cardinal de Lorraine grâd oncle de Monsieur de Rheims, à la memoire duquel la Religion, & l'Estat ont des obligations immortelles, fist cognoistre audit Concile qu'il n'estoit pas raisonnable d'autoriser ladite proposition, ny d'en faire vne regle generale.

D'autant, disoit-il, qu'il y a des Benefices fort riches & opulens, lesquels ne se pourroient dire greuez, quand mesme ils payeroient les deux tiers, & d'autres si pauvres, qu'ils ne peuvent porter aucune pension quelle qu'elle soit.

D'ailleurs, ce seroit lier les mains au Saint Pere, & nuire aux Souuerains qui ont droit de faire establir des pensions sur les Benefices de leur nomination, telles qu'ils iugent à propos, selon la portée du reuenue desdits Benefices, & le merite des personnes qu'ils veulent gratifier.

Tant y a sur ces considerations cette grande lumiere de l'Eglise porta les resolutions dudit Concile, à n'ordonner autre chose que le Decret que nous voyons en la Session 24. de la reformation generale de l'Eglise, qui porte, Que les Eueschez auxquels il ne reste que mil ducats d'entretienement pour les Euesques, ne pourront estre chargez d'aucune pension, comme pareillement les Cures, s'il ne reste au Curé au moins cent ducats pour s'entretenir.

Laisant pour le surplus à l'autorité du Saint Pere, & à l'equite de sa conscience la disposition libre des pensions sur les Benefices de grand reuenue, & qui les peuvent porter.

Comme par effect, encore bien que nous ayons fauorisé en ce Royaume la proposition susdite, qui demandoit la reduction des pensions au tiers: neantmoins ce n'a iamais esté que pour les Benefices qui ne dependent point du Roy; car pour les Benefices Consistoriaux, & qui sont à la nomination de sa Maiesté, il ne se trouuera vn seul Arrest qui ait reduit au tiers, ny reformé aucune pension imposée sur tels Benefices du consentement du Roy, & de l'autorité du Saint Pere.

La raison en est, parce que ce sont deux puissances souueraines qui donnent en telles matieres la loy qu'on ne peut enfreindre ny violer.

En second lieu, ce seroit faire preiudice au Roy, & le rendre de pire condition que le Roy d'Espagne dans ses Estats, lequel comme il a des Eueschez de grand reuenu, est en possession d'y faire imposer de grosses pensions iusques à soixante, & quatre vingts mil ducats.

Pourquoy donc le Roy n'auroit-il ce mesme pouuoir sur les grands Benefices de son Royaume qui sont à sa nomination, & qui peuuent porter des grandes pensions, principalement pour gratifier les Princes, & les personnes illustres de son Estat?

Veu d'ailleurs qu'en la creation de telles pensions il ne se fait rien qu'avec exacte cognoissance de cause, le Roy ne donne iamais son consentement, qu'il ne soit bien informé de la valeur du Benefice, sur lequel la pension est imposée, & le Pape aussi en est fort assuré par la taxe des Annates qui est à Rome, laquelle luy apprend certainement la vraye valeur des Benefices de France, où le Roy a droit de nommer.

Tellement qu'apres cela, la pension qui est imposée par le Sainct Pere, conformément à la volonté du Roy, est vn iugement souuerain que nul Iuge estably en terre ne peut infirmer, ny reformer.

Or afin de reduire la These de tout ce discours à l'hypothese qui est à iuger, il suffiroit d'auoir monstré que puisque ladite pension créée par le Pape Paul V. au profit de Monsieur de Rheims est de cette qualité, elle ne peut estre dite illicite ny excessiue, & le sieur de Rebé est sans fondement, ny pre-texte, pour en faire plainte.

Mais pour passer plus auant, tant s'en faut que ladite pension soit onereuse, ny de la nature de celles qui sont subiettes à reduction; qu'au contraire elle est de pire condition pour le pensionnaire que si elle n'estoit que du tiers des fruits, ou de la valeur d'iceux.

D'autant qu'il seroit loisible audit pensionnaire de prendre ce tiers sur tout le reuenu dudit Archeuesché de Narbonne franc & quitte de toutes charges; ce que la signature de Cour de Rome qui a créé ladite pension ne porte point: car elle veut qu'elle soit payée, pourueu qu'il reste au titulaire cinq mil escus d'or en or pour son entretenement, avec exem-

prion de toutes charges.

De maniere que si leſdites charges qui n'ont iamais excédé douze mil liures par chacun an, eſtoient telles que le ſieur de Rebé veut faire croire, elles ſont au preiudice & à la diminution de ladite penſion, parce qu'il les faut acquitter auant que le penſionnaire puiſſe rien prendre; & ſi apres leſdites charges, & le titulaire payé il ne reſte rien pour luy, il n'aura rien.

Mais le ſieur de Rebé qui trauaille en procès ſon bienfaicteur, apres la condamnation volontaire qu'il a ſubie de ladite penſion, n'a aucun ſubjet raifonnable de ſe plaindre contre la creation & execution d'icelle.

Il luy reſte cinq mil eſcus quittes pour ſon entretenement: il y a peu d'Archeueſques & Eueſques en France qui en ayent autant; Monsieur de Rheims ſon maistre qui tient la premiere dignité Eccleſiaſtique du Royaume n'a pas quinze mil liures quittes de la manſe de ſon Archeueſché.

L'Archeueſque de Tholoze qui eſt vn perſonnage de merite & d'erudition ſinguliere, ſe contente de deux mil eſcus; parce que Monsieur le Cardinal de la Valette ſon reſignant s'eſt reſerué le reſte des fruits par forme de penſion, & ne luy a laiſſé que ſix mil liures pour ſon entretenement.

Et toutesfois le ſieur de Rebé ſe plaint, de ce que de ſimple Chanoine on l'a fait Archeueſque, avec vn appannage de cinq mil eſcus d'or en or par chacun an pour ſouſtenir ſa dignité; au lieu d'yſer de gratitude enuers le bienfaicteur duquel il tient le bien & l'honneur, il taſche de le ſupplanter: au lieu de ſouffrir l'execution d'un Arreſt tres-juſte, où le iugement interieur de l'ame, & la recognoiſſance de ſa faute l'auoient porté, il s'y oppoſe maintenant, pour remettre en controuerſe les choſes iugées, & pour auoir pretexte de vexer vn Prince quil'a comblé de bienfaits.

Le Conſeil iugera ſ'il y a propos, ny apparence en cette pretenſion.

Par ces moyens Monsieur l'Archeueſque Duc de Rheims conclud, à ce que ledit ſieur de Rebé ſoit debouté de ladite requête afin d'oppoſition, enſemble de ſeldites lettres en forme de requête ciuile, & condamné en l'amende & aux

despens; ce faisant ordonné que ledit Arrest du 30. Avril
1630. sera executé selon sa forme & teneur, & lesdits Fermiers
condamnez de vuidier leurs mains au profit dudit Seigneur de
Rheims, des sommes qu'ils peuuent auoir par deuers eux du
prix de leur bail iusques à la concurrence des arrerages de la di-
te pension escheuz & adiugez, & pour acquitter le cou-
rant d'icelle, quoy faisant ils en demeureront bien & vala-
blement deschargez.

Monsieur DE MONTMAGNY, Rapporteur.



Handwritten text, likely bleed-through from the reverse side of the page. The text is mirrored and difficult to decipher.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.